

## **Pos Malaysia lancar setem khas 'Palestin Merdeka', dijual bermula 18 Januari 2024**

Bernama

Disember 15, 2023 06:00 MYT

KUALA LUMPUR: Sebagai tanda solidariti kepada perjuangan rakyat Palestin, Pos Malaysia pada Khamis melancarkan setem khas "Palestin Merdeka" yang akan berada di pasaran bermula 18 Januari tahun depan.

Menteri Komunikasi Fahmi Fadil berkata pelancaran setem khas itu bukan sekadar simbolik, sebaliknya melambangkan solidariti dan sokongan penuh rakyat Malaysia terhadap perjuangan rakyat Palestin untuk mencapai kemerdekaan dan keamanan.

"Kita akan pertimbang sekiranya perlu setelah dilancarkan (setem) ataupun setelah mula ada di pasaran mungkin kita akan berbincang dengan pertubuhan bukan kerajaan (NGO) untuk mengusahakan kempen menghantar surat untuk menggesa supaya gencatan senjata dilakukan," katanya di sini semalam.

Terdahulu Fahmi menyempurnakan majlis pelancaran setem khas berkenaan yang akan akan dijual secara dalam talian di [www.pos.com.my/shop](http://www.pos.com.my/shop) dan di Pejabat Pos dan Biro Filateli Pos Malaysia pada harga RM1.30 setiap setem.

Fahmi berkata, ia merupakan kali ketiga setem berkaitan Palestin dikeluarkan, kali pertama pada 1978 dan kali kedua pada 1982, bukti komitmen kerajaan dan rakyat Malaysia yang teguh bersama menyokong perjuangan rakyat Palestin sejak dahulu lagi.

Setem berkenaan juga boleh dibeli dalam bentuk helaian setem, mengandungi 20 setem setiap helaian, pada harga RM26. Sampul Hari Pertama pula boleh didapati pada harga RM0.50 dan Folder pada harga RM6.

Sebahagian daripada hasil jualan akan disalurkan kepada Tabung Akaun Amanah Kemanusiaan Rakyat Palestin yang diuruskan Kementerian Luar.

Dana itu akan disalurkan melalui inisiatif Ops Ihsan, kolaborasi antara Kerajaan Malaysia dan 53 pertubuhan bukan kerajaan (NGO) kemanusiaan untuk menyampaikan bantuan kemanusiaan kepada rakyat Palestin di Gaza.

Turut hadir pada majlis pelancaran itu ialah Pengerusi Pos Malaysia Tan Sri Syed Faisal Albar dan Ketua Pegawai Eksekutif Kumpulan Pos Malaysia Charles Brewer.

-- BERNAMA